

MIZORAMAH HANDLOOM PUANTAH HI EIZAWNNA TLAK A NI

*C.Lalchhandama
Joint Director (H&H)
Commerce & Industries Dept*

Hun hmasaah khan “HANDLOOM HI” tih leh “MIZORAM HANDLOOM HMATHLIR”, tih thupui hmanga Commerce & Industries Department, Mizoram hmalak dante leh enterpreneur-te hmalak dan ka rawn ziak nual tawh a. Tin, Handloom lam a hmabak kan neih / hmasawn zelna atana pawimawh \henkhat ka rawn chhawp leh a ni. Tunah erawh chuan, ‘MIZORAMAH PUANTAH HI EIZAWNNA TLAK A NI’ tih ka rawn ziak ve leh thung dawn a ni.

ENG NGE EIZAWNATLAK A NIH DAN CHU

Puantah Khawl:

Tun hma keini Mizote’n Puanbu (Loin loom) kan tih hi chu a puan tah chhuah hi \ha thawkhat viau mah se puan pakhat tah chhung hi a reiin puan zeh mawi te phei chu a tah chhung hi a rei mah mah deuh a. Amaherawhchu, hei pawh hi hlutna chang kan hre tial tial a, a puan tah chhuah hi man man zawkin tun dinhmunah hi chuan hralh a tla ta tial tial a ni. Mizo puanbu (Loin Loom) hmanga puantaha ei zawng kan pung ta mek a ni.

Zoloom leh Fly Shuttle Loom hmanga puan tah:

Heng puantah khawl pahnihte hi Mizorama puantahtu (weavers) te’n puantah nana kan hman lar ber berte an ni a. A puan tah chhuah pawh a \hain a chak bawk. Kan Mizo hmeichhiate’n inthuum nan kan hman tlanglawn ber leh kan duh ber chu, heng puantah khawl hmanga puantah chhuah, ‘Puan’ kan tih hi a ni. Keini Mizo chang hian kan duh a ni lo va, NORTH EAST INDIA-a kan tribal-puite hian mawi an tiin Mizo puan tah chhuahte hi an lei nasa em em a ni.

Heng kan han sawi bakah pawh hian Myanmar, Malaysia & Philippines ram thleng pawhin kan puan product-te hi mawi an tiin an lei duh hle tih thu te hi kan dawng reng a ni.

Eng nge eizawnatlak a nih nachhan?

Mizoramah hian puantaha eizawng hi kan \hahnem ve ta viau mai. 4th National Handloom Census-ah khan weaver ringawt pawh 28,000 chuang kan awm tawh a.

Mahnia puanbu neia eizawng ngawt pawh, Aizawl district-ah hian \hahnem tak an awm a. Mi pakhatin Puanbu 5,10,20,30,40,50-80 lai nei te kan awm a ni. Heng

puantahtute Sum che vel hi average (a vaia belh khawmin) in, cheng Nuai 700-1300 vel kum khatah a tling hial a.

Serchhip district chhung, Thenzawlah ngawt pawh Nuai 700-1000 vel kum khat a Sum che vel a ni.

Kanghmun 'S', Mualthuam, Zote leh Chhiphir khuate phei chuan thlawhhma la tawh lovin In za khuaah 80% chhungkuain puan tahin ei an zawng tawh a ni.

Heng ka han sawi khua te hian an puantah chhuah a\anga Sum an hmuh hmang hian, Chenna In \ha tak tak an sa- in, an fate School \haah an luhtir theih mai bakah, phai lam zirna \ha zawkah an kal tir thei a ni.

Tun hmaa thlawhhma laa inchawmzo mang lo (Tu huatthu ni lo se) te kha, tunah chuan tu dang ngai em em bik lovin, puantah lamah hma ngawrh taka lain, mi dangte tan malsawmna an ni let ta tlat mai hi a mak a ni.

Puantah hi eizawna tlak a lo ni ngei, tih hi hre thar tam tak an lo piang thar zel a. A lo ti hmasatute'n mahni hmasial miah lovin, an train chhuak reng bawk a.

Commerce & Industries Dept. pawhin Handloom Training Center, Aizawl, Lunglei, Siaha-ah te dinin, puantah thiam kum tin 70 vel a hring chhuak reng bawk a. Central Scheme a\ang pawhin puantah thiam zirtirin, kum 4/5 chhung ngawt pawhin mi sang chuang fe zir chhuak an awm a ni.

Mizoramah puantaha eizawng he ti zat hi awmin lang mah se **market lamah hnawng ala awm rih lo tlat mai te** hi a ropuina deuh deuh chu a ni a, ala pung zel dawn pawhin a lang.

Thingtlang (Zokhua) Unaute'n \an lak nachang an hre tial tial tih kan Sawrkar pawhin hriain, Commerce & Industries Department changtu Hon'ble Minister Dr. R.Lalthangliana te, Industrial Development Board Vice Chairman, Pu C. Ramhluna IFS leh Commerce & Industries Dept Director, Pu J.Hmingthanmawia IAS te chuan \an lain, puantah lama hmasawn zel a nih theih nan leh puantahtute hman atan Mizoram hmun eng emaw zatah Common Facilities Center (CFC) a dah mek a. Ala dah belh zel dawn bawk a ni.

Mizoram Economy siam \hat nan hian mi thiamte'n an lo thlirnaah pawh, puantah hi a \ha ber pawl a nih an ring. 'EIZAWNNA TLAK' mahni in lumah/hulhliapah thlamuang tak leh taima tak a an puamtah chhuah hmangin Mizoram hi an tuam mek a tih loh theih loh a ni.

Khuallian, mi pawimawhte pawhin Mizoram puantahtute puantah mawi tak tak an sin haw mek zel a, India ram chhungah Mizoram puantahtute hmimg hi ala thang chhuak ngei ang chu.

Hun te kan la nei em ang a, a technical takin 'PUANTAH HI SIZAWNNA TLAK' a nih zia kan la rawn ziak leh ang chu.

Industry Meichher
Jan-Mar, 2020